

Air ais a Hiort

Suidheachadh

'S e seo a' bhliadhna 2015. Tha Arm Bhreatainn air Hiort fhàgail. Tha iad air na togalaichean aca a leagail, 's chan eil air fhàgail ach na seann taighean dubha ann an sreath os cionn a' bhàigh. Tha mullaichean air na h-uimhir dhiubh fhathast, ach tha cuid mhòr a' tuiteam às a chèile.

Tha fear beairteach à Canada air Hiort a cheannach 's tha e a' dol a chur sgeama ùr air dòigh. Còig bliadhna deug air ais chunnaic e *Castaway 2000* air an telebhisean far an deach buidheann de dhaoine fhàgail ann an Tarasaigh fad bliadhna. Ach bidh seo eadar-dhealaichte ann an dà dhòigh - cha bhi ceanglaichean *sam bith* eadar Hiort 's an còrr den t-saoghal fad *dusan* bliadhna. Bidh na daoine leotha fhèin 's cha bhi cuideachadh ri fhaighinn bhon t-saoghal a-muigh.



Tha am fear beairteach airson dearbhadh gur urrainn do dhaoine an latha an-diugh tighinn beò ann an àiteachan iomallach iargalta. Tha e airson dusan duine a thrusadh a nì dachaigh, beatha 's bith-beò dhaibh fhèin 's a chruthaicheas coimhearsnachd ùr a mhaireas às an dèidh.

'S e a' cheist - cò thèid a thaghadh 's carson?

Taghadh

Feumaidh sibhse, nur buidhnean, dusan duine a thaghadh a fhreagras air an sgeama. Tha agaibh ri dhaoine le diofar sgilean is buadhan a thaghadh. Tha an liosta den luchd-thagraidh air an ath dhuilleig.

Smaoinichibh air seo:

- dè am feum a nì gach duine?
- dè an cron a dh'fhaodadh iad dèanamh?
- carson 's ciamar a bhiodh iad feumail?
- am biodh feum annta ann an dòighean eile seach dòighean practaigeach?
- am biodh àite ann do bhodaich 's do chailleachan is dhan chloinn bhig?
- chan ann ag obair fad na h-ùine a bhiodh iad - ciamar a dhèanadh iad dibhearsan?
- ma thaghas sibh aon duine à càraid no teaghlach, saoil an gabh an duine eile ris a' chothrom?

Air ais a Hiort

Luchd-tagraidh

Aonghas Bàn MacMhathain (42). Bàrd is sgrìobhaiche sgeulachdan. Uaireigin ag obair na shaor a' togail àirneis taighe is thogalaichean ùra.

Catrìona Nic a' Bhriuthainn (38). Neach-naidheachd. Ag obair ann an rèidio agus telebhisean, agus roimhe sin air pàipear-naidheachd.

Ceit-Anna NicDhùghaill (45). Bean-taighe. Ag obair ann am bùth mus do phòs i.

Seòras MacDhùghaill (50). Fear bùtha. An duine aig Ceit-Anna. Tha bùth bheag aige far am bi e fhèin ag obair. Bha a bhean ag obair ann mus do phòs iad, ach chan eil e airson 's gum bi mnathan pòsta ag obair taobh a-muigh an dachaigh.

Donnchadh MacSuain (39). Ag obair ann an garaids. Chaill e a bhean o chionn ceithir bliadhna. Tha dithis chloinne aige - **Marsaili** (8) agus **Niall** (6).

Eachann MacAmhlaigh (24). Connstabal poilis an Obar Dheathain. Rinn e cùrsa oilthigh ann an coilltearachd.

Seònaid Mhoireach (23). Leannan Eachainn. Gruagaire. Thogadh i sa bhaile mhòr. Tha nighean aice fhèin 's Eachann - **Melanie** (2). Tha dùil aice ri leanabh.

Eilidh Chamshron (28). Bha i pòsta aig tuathanach cruidd is chaorach ann an Cataibh mus do dhealaich i ris. Rinn i fhèin cùrsa ann am biathadh is còcaireachd. Tha dùil aice ri leanabh.

Iagan Bochanan (47) Sagart. Bha e na thidsear Saidheans ann an àrdsgoil mus deach e a-steach dhan t-sagartachd.

Maighread Ghrannnd (26). Nurs do dhaoine le trioblaidean inntinn. Cha do rinn i cùrsa ann an nursadh àbhaisteach.

Màiri Ghreumach (43). Dànnsair aig Ballet na h-Alba agus tidsear spòrs ann an àrdsgoiltean.

Calum Greumach (24). Mac Màiri. Draibhear bus agus fear-càraidh einnseanan.

Iseabail NicLeòid (23). Leannan Chalaim. Gàirnealair ann am pàircean baile mhòir. Eòlach air toirt fàs air luibhean is glasraich.

Niall Greumach (21). Mac Màiri. Oileanach a' dèanamh ceòl anns an oilthigh.

Murchadh MacIllFhinnein (64). Ministear anns an Eaglais Shaoir. Bha e na sheirbhiseach stàite mus deach a-steach dhan mhinistearalachd.

Peigi NicIllFhinnein (60). Bean Mhurchaidh. Tidsear bunsgoile mus do leig i dhith a dreuchd na bu thràithe am-bliadhna.

Seòras MacIllFhinnein (33). Mac Mhurchaidh 's Peigi. Chan urrainn dha obair air sàilleabh tubaist nuair a bha e na dheugair. 'S ann air èiginn a nì e coiseachd.

Seumas Stiùbhart (36). Dotair. A' togail bhàtaichean 's a' cluiche a' bhocsa na thìde fhèin. Tha e gay.

Dòmhnall Iain MacFhionghain (34). Croitear. A bharrachd air a' chroitearachd tha e air a bhith an cois àrach-èisg. An leannan aig Seumas.

Sìne Robasdan (22). Rùnaire aig manaidsear companaidh. Sgilean cunntasachd is coimpiutarachd.

Alasdair MacMhaoilein (27). Ag obair ann an teicneòlas fiosrachaidh. Leannan Sìne.

Ùisdean Caimbeul (54). Bha e fichead bliadhna ag òl 's ga chur a shlàinte ann an cunnart. Clachair. Ag iarraidh cothrom air beatha ùr a dhèanamh dha fhèin.

Agnes Dhòmhnallach (52). Piuthar Ùisdein. Còcaire ann an ospadal fad còrr is 30 bliadhna. Car trom air an deoch.

Lachlann Dhòmhnallach (55). An duine aig Agnes. Smàladair agus eòlach air Ciad Fhuasgladh. Car trom air an deoch.

Ùna NicAonghais (57). Glanadair sgoile. Dealachta ris an duine aice. Tha clann aice ach tha an teaghlaichean fhèin aca a-nis.